

BOSNA I HERCEGOVINA
CENTRALNA IZBORNA KOMISIJA
SREDIŠNJE IZBORNO POVJERENSTVO



БОСНА И ХЕРЦЕГОВИНА
ЦЕНТРАЛНА ИЗБОРНА КОМИСИЈА

**PRAVILNIK
O VOĐENJU I UPOTREBI
CENTRALNOG BIRAČKOG SPISKA**

Sarajevo, april 2014. godine

Na osnovu člana 2.9. stav (1) tačka 2., a u skladu s Poglavljem 3. Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13 i 7/14), Centralna izborna komisija Bosne i Hercegovine na 18. sjednici, održanoj 24.04.2014. godine, d o n i j e l a j e

P R A V I L N I K O VOĐENJU I UPOTREBI CENTRALNOG BIRAČKOG SPISKA

POGLAVLJE I. UVODNE NAPOMENE

Član 1. (Primjena)

Ovim pravilnikom se utvrđuje:

- a) rokovi i način za zaključivanje i potvrđivanje konačnog Centralnog biračkog spiska i rokovi za dostavljanje podataka o promjenama u evidencijama raseljenih lica i evidenciji državljana koji glasaju van Bosne i Hercegovine (član 3.6 stav (6) tačka a) i b) Izbornog zakona BiH),
- b) način, odgovornost za rad, rok za uspostavljanje i druga bitna pitanja za rad Centra za birački spisak (3.8 stav (5) Izbornog zakona BiH),
- c) sadržaj i forma obrasca zahtjeva za određivanje ili promjenu biračke opcije (član 3.9 stav (5) Izbornog zakona BiH),
- d). forma i sadržaj izvoda iz Centralnog biračkog spiska koji se koriste za provođenje izbora (član 3.10 stav (3) Izbornog zakona BiH),
- e) postupak i način slanja, primanja, obrade, arhiviranja i zaštite elektronskih prijava i dokumenata (član 3.15 stav (5) Izbornog zakona BiH) i
- f) forma obrasca prijave iz člana 3.15 stav (1), (2) i (3) Izbornog zakona BiH, način i postupak kojim se provjerava tačnost podataka u dokumentima koja podnesu izbjegla lica, te uputstva vezana za postupak upisa birača u izvod iz Centralnog biračkog spiska za glasanje van BiH (član 3.15 stav (8) Izbornog zakona BiH).

POGLAVLJE II. ROKOVI ZA DOSTAVLJANJE I ZAKLJUČIVANJE CENTRALNOG BIRAČKOG SPISKA

Član 2. (Rokovi za zaključivanje i potvrđivanje konačnog Centralnog biračkog spiska – član 3.6 stav (6) tačka a) Izbornog zakona BiH)

(1) Centralna izborna komisija BiH zaključuje i potvrđuje Centralni birački spisak sa stanjem na sljedeće dane:

- a) dan prije raspisivanja izbora sa stanjem u 24.00 sata,
- b) za birače koji glasaju van BiH, 75 dana prije dana održavanja izbora u 24.00 sata,
- c) za redovne birače 45 dana prije dana održavanja izbora u 24.00 sata i
- d) na dan održavanja izbora u 24.00 sata.

(2) Sve promjene koje su nastale nakon roka utvrđenog u stavu (1) ovog člana neće biti sadržane u zaključenom i potvrđenom Centralnom biračkom spisku.

(3) Odluka o zaključivanju i potvrđivanju Centralnog biračkog spiska sadrži datum i ukupni broj upisanih birača po izbornim jedinicama, a objavljuje se u službenim glasilima.

Član 3.

(Rokovi i način za dostavljanje podataka o promjenama u evidencijama raseljenih lica i evidenciji državljana koji glasaju van Bosne i Hercegovine – član 3.6 stav (2) tačka b) i c) i član 3.6 stav (6) tačka b) Izbornog zakona BiH)

(1) Ministarstvo za ljudska prava i izbjeglice BiH podatke o promjenama u evidencijama raseljenih lica dostavlja Centralnoj izbornoj komisiji BiH najkasnije do dana raspisivanja izbora.

(2) Raseljeno lice iz stava (1) ovog člana ima pravo da odredi ili promijeni svoju biračku opciju u nadležnom Centru za birački spisak, najkasnije 75 dana prije održavanja izbora.

(3) Državljanin BiH koji privremeno živi u inostranstvu ili državljanin BiH koji ima status izbjeglog lica iz BiH, upisuje se u Centralni birački spisak za glasanje izvan BiH najkasnije 75 dana prije dana održavanja izbora.

POGLAVLJE III. CENTAR ZA BIRAČKI SPISAK

Član 4.

(Uspostava i rad Centra za birački spisak – član 3.8 stav (4) i (5) Izbornog zakona BiH)

(1) U svakoj općini, gradu i Brčko distriktu BiH nadležni organ uspostavlja Centar za birački spisak (u daljnjem tekstu: Centar).

(2) Nadležni organ iz stava (1) ovoga člana donosi akt o uspostavljanju Centra. Aktom o uspostavljanju Centra, utvrđuju se unutrašnja organizacija i sistematizacija Centra, način rukovođenja Centrom, ovlaštenja u vođenju Centralnog biračkog spiska, odgovornost za rad Centra, odgovornost zaposlenih u Centru, kao i ostala pitanja bitna za rad Centra.

(3) Uredi u kojima se vode i čuvaju matične knjige kao i drugi uredi dostupni javnosti mogu služiti kao Centar za birački spisak, i kao takvi moraju biti vidno označeni.

Član 5.

(Oprema)

Centar za birački spisak uspostavlja se u prostoriji koja će biti opremljena, pored ostalog, i jednim računarom koji će se koristiti za potrebe centra, telefonskom linijom sa direktnim izlazom, te internet konekcijom i aplikacijom za vođenje Centralnog biračkog spiska.

Član 6.

(Obuka)

Obuku zaposlenih u Centru obavlja izborna komisija osnovne izborne jedinice na osnovu posebnog plana i programa koji je obavezna donijeti u skladu s planom i programom edukacije organa za provođenje izbora, koje donosi Centralna izborna komisija BiH.

Član 7.

(Nadležnosti)

(1) Centar za birački spisak:

- a) pruža tehničku pomoć izbornoj komisiji osnovne izborne jedinice u određivanju biračkih mjesta na teritoriji osnovne izborne jedinice i raspoređivanju birača po biračkim mjestima, ažurira podatke o biračkim mjestima i promjenama biračke opcije u skladu sa aktima

Centralne izborne komisije BiH, vodi evidenciju o svim naseljenim mjestima i nazivima svih ulica na teritoriji svoje općine i o svim promjenama obavještava izbornu komisiju osnovne izborne jedinice,

- b) prima zahtjeve raseljenih lica za određivanje ili promjenu biračke opcije i putem odgovarajućeg programa vrši obradu zahtjeva,
- c) prima zahtjeve za promjenu biračke opcije lica upisanih u izvod iz Centralnog biračkog spiska za glasanje izvan BiH, a radi se o licima koja su se vratila u zemlju prije roka utvrđenog za zaključenje izvoda iz Centralnog biračkog spiska,
- d) učestvuje u realizaciji izlaganja izvoda iz privremenog Centralnog biračkog spiska,
- e) osigurava uvid u izvod iz Centralnog biračkog spiska na teritoriji svoje osnovne izborne jedinice,
- f) osigurava i druge podatke za Centralni birački spisak koji su utvrđeni aktima Centralne izborne komisije BiH,
- g) pruža tehničku pomoć izornoj komisiji osnovne izborne jedinice u vezi sa zahtjevima i prigovorima birača koji se odnose na izvod iz Centralnog biračkog spiska,
- h) pruža tehničku pomoć izornoj komisiji osnovne izborne jedinice prilikom imenovanja biračkih odbora (pomoć pri žrijebanju, kod izrade akata o imenovanju, obuke biračkih odbora i sl.),
- i) pruža tehničku pomoć izornoj komisiji osnovne izborne jedinice prilikom provjere i pripreme biračkih mjesta za izbore,
- j) pruža tehničku pomoć izornoj komisiji osnovne izborne jedinice u kampanji obavještavanja birača o svim segmentima u vezi s izbornim procesom,
- k) pruža tehničku pomoć izornoj komisiji osnovne izborne jedinice prilikom objedinjavanja izbornih rezultata na nivou osnovne izborne jedinice, a Centralnoj izornoj komisiji BiH obavezan je dostaviti rezultate sa svih redovnih biračkih mjesta u elektronskoj verziji, urađenoj u računarskom programu dobijenom od Centralne izborne komisije BiH, za sve nivoe i sve kategorije (po političkim subjektima i kandidatima unutar političkih subjekata) i
- l) druge poslove koje mu odredi Centralna izborna komisija BiH i izborna komisija osnovne izborne jedinice.

(2) Centar za birački spisak vodi evidenciju podnesenih zahtjeva i prigovora iz stava (1) tačka g) ovog člana i dužan je čuvati dokumentaciju priloženu uz te zahtjeve i prigovore.

Član 8.

(Odgovornost za rad)

- (1) Nadležni organ iz člana 4. stav (1) ovog pravilnika odgovoran je za rad Centra za birački spisak.
- (2) Izborna komisija osnovne izborne jedinice ima pravo izvršiti kontrolu rada Centra za birački spisak.
- (3) Izborna komisija osnovne izborne jedinice pokrenut će postupak po službenoj dužnosti protiv zaposlenog u Centru za birački spisak koji povređuje prava birača ili političkog subjekta ustanovljena Izbornim zakonom BiH i ovim pravilnikom.
- (4) Centar za birački spisak podnosi sedmični izvještaj Centralnoj izornoj komisiji BiH, putem nadležne izborne komsije.

Član 9.

(Radno vrijeme)

- (1) Redovno radno vrijeme Centra za birački spisak jednako je radnom vremenu organa uprave osnovne izborne jedinice.
- (2) Ako se u određenom periodu poveća obim posla, nadležni organ iz člana 4 stav (1) ovog pravilnika, samostalno ili na prijedlog izborne komisije osnovne izborne jedinice, može naložiti da Centar za birački spisak radi i duže od redovnog radnog vremena, kao i da radi u neradne dane, u smjenama i sa više izvršilaca.

(3) Centar za birački spisak je obavezan na pogodan način obavijestiti birače o radnom vremenu ovog Centra.

POGLAVLJE IV. BIRAČKA OPCIJA

Član 10.

(Sadržaj i forma obrasca zahtjeva za promjenu biračke opcije PBO-1 - član 3.9 stav (5) Izbornog zakona BiH)

(1) Zahtjev za promjenu biračke opcije raseljeno lice podnosi lično na PBO-1 obrascu zahtjeva za promjenu biračke opcije za raseljena lica, koji je sastavni dio ovog pravilnika. Obrazac zahtjeva za promjenu biračke opcije raseljenog lica sadrži:

- a) zaglavlje sa memorandumom Centralne izborne komisije BiH;
- b) lične podatke podnosioca zahtjeva: ime i prezime, djevojačko / prethodno prezime, datum rođenja, ime i prezime jednog roditelja, jedinstveni matični broj, spol lica i mjesto rođenja;
- c) podatke o adresi prebivališta (općina, naseljeno mjesto, ulica i kućni broj) koja je prijavljena u skladu sa zakonom;
- d) podatke o općini i adresi prebivališta prema popisu 1991. godine ili prebivališta do stjecanja statusa izbjeglog lica;
- e) podatke o dokumentaciji koja se prilaže uz zahtjev;
- f) podatke o biračkoj opciji prema sadržaju obrasca;
- g) potpis podnosioca zahtjeva i datum podnošenja zahtjeva;
- h) podatke o nadležnom Centru za birački spisak i
- i) datum i potpis obrađivača zahtjeva.

(2) Uz popunjen obrazac PBO-1 raseljeno lice dužno je službeniku nadležnog Centra za birački spisak lično predložiti jedan od važećih originalnih dokumenata iz člana 5.12 stav (4) Izbornog zakona BiH, radi identifikacije, a u spis koji vodi nadležni Centar za birački spisak priložiti kopiju predloženog identifikacionog dokumenta.

Član 11.

(Način prijema zahtjeva i rokovi - član 3.9 stav (5) Izbornog zakona BiH)

(1) Službenik nadležnog Centra za birački spisak će raseljenom licu koje je podnijelo zahtjev za promjenu biračke opcije izdati potvrdu o prijemu zahtjeva.

(2) Nakon što utvrdi identitet podnosioca zahtjeva iz stava (1) ovog člana, službenik nadležnog Centra za birački spisak izvršit će provjeru podataka koji se vode u službenim evidencijama o prebivalištu podnosioca zahtjeva prema popisu iz 1991. godine.

(3) Po provedenim radnjama iz stava (1) i (2) ovog člana, službenik nadležnog Centra za birački spisak svojim potpisom ovjerava autentičnost unesenih podataka.

(4) U periodu održavanja redovnih izbora za organe vlasti u BiH, zahtjev se mora podnijeti najkasnije u roku utvrdenom u članu 3. stav (2) ovog pravilnika kako bi se promjene biračke opcije ažurirale.

Član 12.

(Postupak i podnošenje zahtjeva PBO-2 za promjenu biračke opcije - član 3.16 stav (4) i 5.18 stav (1) Izbornog zakona BiH)

(1) Ako se državljanin BiH koji se nalazi na izvodu iz Centralnog biračkog spiska za glasanje izvan BiH vrati u BiH prije isteka roka za zaključivanje izvoda iz konačnog Centralnog biračkog spiska za naredne izbore, dužan je lično podnijeti zahtjev za promjenu biračke opcije kako bi bio upisan u izvod iz Centralnog biračkog spiska za glasanje na odgovarajućem biračkom mjestu u osnovnoj izbornoj jedinici u kojoj ima prijavljeno prebivalište u skladu s članom 20.8 Izbornog zakona BiH.

(2) Zahtjev se podnosi nadležnom Centru za birački spisak putem PBO-2 obrasca zahtjeva za promjenu biračke opcije za birače koji su glasali izvan BiH, najkasnije u roku utvrdenom u članu 3.

stav (3) ovog pravilnika, po proceduri iz člana 11. ovog pravilnika. Centar za birački spisak će putem izborne komisije sve obrasce zahtjeva za promjenu biračke opcije birača koji su upisani za glasanje izvan BiH dostaviti Centralnoj izbornoj komisiji BiH najkasnije u roku od sedam dana od dana njihovog prijema, radi ažuriranja promjena biračke opcije birača u odgovarajućem izvodu iz Centralnog biračkog spiska.

(3) Uz potpisan i popunjen obrazac PBO-2 birač je dužan službeniku nadležnog centra za birački spisak lično predložiti jedan od važećih originalnih dokumenata iz člana 5.12 stav (4) Izbornog zakona BiH, radi identifikacije, a u spis koji vodi nadležni centar za birački spisak priložiti kopiju predloženog identifikacionog dokumenta.

(4) PBO-2 obrazac zahtjeva za promjenu biračke opcije, koji je sastavni dio ovog pravilnika, sadrži sljedeće podatke:

- a) zaglavlje sa memorandumom Centralne izborne komisije BiH,
- b) lične podatke podnosioca zahtjeva: ime i prezime, djevojačko / prethodno prezime, datum rođenja, ime i prezime jednog roditelja, jedinstveni matični broj, spol lica i mjesto rođenja,
- c) podatke o adresi prebivališta (općina, naseljeno mjesto, ulica i kućni broj) koja je prijavljena u skladu sa zakonom,
- d) podatke o općini i adresi prebivališta prema popisu 1991. godine ili prebivališta do stjecanja statusa izbjeglog lica,
- e) podatke o dokumentaciji koja se prilaže uz zahtjev,
- f) podatke o biračkoj opciji prema sadržaju obrasca,
- g) potpis podnosioca zahtjeva i datum podnošenja zahtjeva,
- h) podatke o nadležnom centru za birački spisak i
- i) datum i potpis obrađivača zahtjeva.

(5) U periodu održavanja redovnih izbora za organe vlasti u BiH, zahtjev se mora podnijeti najkasnije u roku utvđenom u članu 3. stav (3) ovog pravilnika kako bi se promjene biračke opcije ažurirale u evidenciji Centralnog biračkog spiska. Zahtjevi koji budu primljeni nakon ovog roka bit će obrađeni nakon održavanja izbora.

(6) Centralna izborna komisija BiH, Centru za birački spisak putem nadležne izborne komisije dostavlja spisak birača koji su registrovani za glasanje putem pošte za tu osnovnu izbornu jedinicu, kako bi birači ostvarili pravo glasa nepotvrđenim – kovertiranim, personalizovanim, glasačkim listićima, u skladu sa članom 5.18 stav (1) Izbornog zakona BiH.

(7) Birač koji je upisan u Centralni birački spisak za glasanje izvan BiH a koji se na dan izbora nađe u osnovnoj izbornoj jedinici za koju ima pravo glasa i želi da glasa lično, Centar za birački spisak će mu nakon provjere, izdati potvrdu i uputiti ga da glasa lično na biračko mjesto koje izdaje nepotvrđene–kovertirane, personalizovane glasačke listiće.

POGLAVLJE V. IZVODI IZ CENTRALNOG BIRAČKOG SPISKA

Član 13.

(Forma i sadržaj izvoda iz Centralnog biračkog spiska koji se koriste za provođenje izbora - član 3.10 stav (3) a u vezi sa članom 20.8 Izbornog zakona BiH)

(1) Na osnovu elektronske evidencije Centralnog biračkog spiska, Centralna izborna komisija BiH izrađuje:

- a) izvode iz konačnog Centralnog biračkog spiska za redovne birače,
- b) izvode iz konačnog Centralnog biračkog spiska za birače koji glasaju putem pošte,
- c) izvode iz konačnog Centralnog biračkog spiska za birače koji glasaju u diplomatsko-konzularnom predstavništvu BiH (u daljnjem tekstu: DKP BiH),
- d) izvode iz konačnog Centralnog biračkog spiska za birače koji glasaju u odsustvu i
- e) izvode iz Centralnog biračkog spiska za birače koji glasaju nepotvrđenim - kovertiranim glasačkim listićima (birači koji su upisani da glasaju izvan BiH a na dan održavanja izbora se

zateknu u zemlji i birači koji su upisani u Centralni birčki spisak a ime im se ne nalazi na izvodu iz konačnog centralnog biračkog spiska).

(2) Na osnovu podataka koje dostavi općinska/gradska izborna komisija (u daljnjem tekstu: izborna komisija), Centralna izborna komisija BiH izrađuje:

- a) izvod iz konačnog Centralnog biračkog spiska za birače koji su vezani za svoje domove zbog starosti, bolesti ili invaliditeta i
- b) izvod iz konačnog Centralnog biračkog spiska za birače koji su zatvorenici ili su vezani za ustanove, a imaju biračko pravo.

(3) Centralna izborna komisija BiH će na zahtjev organa lokalne samouprave izraditi i dostaviti odgovarajući izvod iz centralnog biračkog spiska za potrebe organizacije i provođenja referenduma, opoziva izabranog funkcionera i izbora organa lokalne samouprave.

(4) Podaci u izvodu iz Centralnog biračkog spiska štampat će se na jezicima i pismima koji su u službenoj upotrebi u BiH.

(5) U izvodu iz konačnog Centralnog biračkog spiska označen je datum njegovog zaključivanja i napomena da promjene izvršene poslije tog datuma nisu uzete u obzir.

Član 14.

(Sadržaj izvoda iz Centralnog biračkog spiska – član 3.10 stav (3) Izbornog zakona BiH)

(1) Izvod iz Centralnog biračkog spiska za redovne birače sadrži sljedeće podatke:

- a) prezime i ime i ime jednog roditelja birača,
- b) datum rođenja,
- c) spol,
- d) JMB i JMB u obliku bar-koda,
- e) naziv općine, grada, odnosno Brčko distrikta BiH,
- f) naziv i šifru biračkog mjesta i broj kombinacije: A ili B za birače koji glasaju u Brčko distriktu BiH
- g) šifru adrese i
- h) rubriku za potpis glasača.

(2) Izvod iz Centralnog biračkog spiska za raseljena lica sadrži sljedeće podatke:

- a) prezime i ime i ime jednog roditelja birača,
- b) datum rođenja,
- c) spol,
- d) JMB i JMB u obliku bar-koda,
- e) općina za koju glasa i
- f) rubriku za potpis birača, koja sadrži oznaku kombinacije.

(3) Izvod iz konačnog Centralnog biračkog spiska iz člana 13. stav (1) tačka e) identičan je izvodu iz stav (1) ovog člana s tim što nema upisane podatke o biračima.

(4) Izvod iz Centralnog biračkog spiska iz stava (1) ovog člana, za birače koji glasaju u Brčko distriktu BiH kada se provode izbori navedeni u članu 18.2 alineja 1) i 2) Izbornog zakona BiH sastoji se iz dva dijela :

- 1) dio A birači koji imaju entitetsko državljanstvo Federacije BiH i
- 2) dio B birači koji imaju entitetsko državljanstvo Republike Srpske.

Član 15.

(Izlaganje izvoda iz Privremenog biračkog spiska na uvid javnosti - član 3.1 stav (4) i 3.11 Izbornog zakona BiH)

- (1) Centralna izborna komisija BiH sa stanjem na dan raspisivanja izbora, sačinjava u skladu sa članom 3.11 Izbornog zakona BiH, izvode iz Centralnog biračkog spiska, koji se dostavljaju izbornim komisijama i centrima za birački spisak, a koji se izlažu na uvid javnosti u periodu od 120-og do 90-og dana prije dana održavanja izbora u svrhu izrade konačnih izvoda iz Centralnog biračkog spiska.
- (2) Izvod iz stava (1) ovog člana izrađuje se na obrascu izvoda iz Centralnog biračkog spiska za redovne birače, u elektronskoj verziji, po osnovnim izbornim jedinicama i biračkim mjestima sa prethodnih izbora i ne sadrži podatke o jedinstvenom matičnom broju i adresi birača.
- (3) Izvodi iz stava (2) ovog člana mogu se dostaviti političkim subjektima u skladu sa članom 3.1 stav (4) Izbornog zakona BiH.

Član 16.

(Dostavljanje izvoda)

- (1) Izvod iz Centralnog biračkog spiska, iz člana 15. ovog pravilnika dostavlja se izbornoj komisiji.
- (2) Izborne komisije dužne su izložiti izvode iz Centralnog biračkog spiska iz člana 15. stav (2) ovog pravilnika kako bi državljani BiH s biračkim pravom imali pristup njima i mogli provjeriti i izvršiti ispravku ili dopunu svojih podataka kod nadležnog organa.
- (3) Izborne komisije dužne su, na pogodan način obavijestiti birače da se izvod iz Centralnog biračkog spiska nalazi u Centru za birački spisak, biračkim mjestima sa prethodnih izbora i mjesnim zajednicama, kako bi mogli provjeriti i izvršiti ispravku ili dopunu svojih podataka kod nadležnog organa i opredijeliti se za biračku opciju (općina, odnosno mjesto glasanja i način glasanja - lično ili u odsustvu).
- (4) Uz izvod iz člana 15. stav (2) pravilnika Centralna izborna komisija BiH dostavlja izbornim komisijama i obrazac zahtjeva iz člana 10. ovog pravilnika kako bi raseljeno lice imalo mogućnost da odabere biračku opciju određenu članom 20.8 Izbornog zakona BiH. Izborne komisije primaju zahtjev od raseljenog lica u roku utvrđenom u članu 3. stav (3) ovog pravilnika i dostavljaju ga Centralnoj izornoj komisiji BiH u elektronskoj formi radi ažuriranja izvoda iz Centralnog biračkog spiska za raseljena lica.

Član 17.

(Plan izlaganja izvoda)

- (1) Izborne komisije donose plan izlaganja izvoda iz člana 15. ovog pravilnika. Ovaj plan obuhvata način obavješćavanja javnosti o trajanju izlaganja ovog izvoda i mjestima na kojima će izvodi iz Centralnog biračkog spiska biti izloženi, odnosno dostupni, kao i način obavješćavanja raseljenih lica o eventualnoj promjeni biračke opcije u centru za birački spisak. Izborne komisije putem plana osiguravaju svim zainteresovanim licima pristup kako bi mogli provjeriti podatke u izvodu iz Centralnog biračkog spiska, te izvršiti njihovu ispravku kod nadležnog organa. Izlaganje izvoda iz Centralnog biračkog spiska traje 30 dana od dana utvrđenog u članu 15. stav (1) ovog pravilnika.
- (2) Izborne komisije dostavljaju planove iz stava (1) ovog člana Centralnoj izornoj komisiji BiH najkasnije 125 dana prije dana održavanja izbora. Ukoliko Centralna izborna komisija BiH ustanovi da planovima iz stava (1) ovog člana nije utvrđen primjeren način obavješćavanja javnosti i raseljenih lica, naložit će izornoj komisiji preduzimanje dodatnih mjera i aktivnosti.

Član 18.

(Izvod iz konačnog Centralnog biračkog spiska za birače koji su vezani za svoje domove zbog starosti, bolesti ili invaliditeta – član 3.14 stav (1) tačka a) Izbornog zakona BiH)

(1) Izvodi iz konačnog Centralnog biračkog spiska za birače koji su vezani za svoje domove zbog starosti, bolesti ili invaliditeta sačinjavaju se na osnovu podataka nadležnog organa zaduženog za socijalno staranje i drugih organa koji imaju podatke o ovim licima, te izražene volje ovih birača da na dan izbora glasaju u svojim domovima, što se utvrđuje pisanom izjavom svakog birača i pratećom medicinskom dokumentacijom o bolesti ili invaliditetu birača kao uslovu za njegovo kućno liječenje.

(2) Dokumentacija iz stava (1) ovog člana sastavni je dio izvještaja koji nadležna izborna komisija dostavlja Centralnoj izbornoj komisiji BiH kao obrazloženje o potrebi glasanja birača sa invaliditetom putem mobilnog tima.

(3) Izborna komisija će najkasnije u roku od 40 dana prije dana održavanja izbora pismenim putem zahtijevati od nadležnih organa podatke o svim licima koja su zbog starosti, bolesti ili invalidnosti vezana za svoje domove a nadležni organ će podatke po zahtjevu izborne komisije dostaviti u roku od 7 dana od dana prijema zahtjeva, radi evidentiranja birača koji su zbog starosti, bolesti ili invalidnosti vezani za svoje domove.

(4) Na osnovu podataka iz stava (2) ovog člana, izborna komisija će u saradnji sa centrom za birački spisak, sačiniti plan obilaska birača iz stava (1) radi prijedloga upisa istih u izvod iz centralnog biračkog spiska, za glasanje putem mobilnog tima.

(5) Izborna komisija će, nakon provedenog postupka iz stava (4) ovog člana, sačiniti spisak birača koji su vezani za svoje domove zbog starosti, bolesti ili invaliditeta i isti će dostaviti Centralnoj izbornoj komisiji BiH u odgovarajućem elektronskom obliku, kao i kopiju dokumentacije iz stava (1) ovog člana, 20 dana prije dana održavanja izbora, radi izrade izvoda iz konačnog Centralnog biračkog spiska. Nakon razmatranja dokumentacije iz stava (1) ovog člana pravilnika, Centralna izborna komisija BiH će utvrditi i sačiniti izvod iz konačnog Centralnog biračkog spiska za ovu kategoriju birača. Izvod iz konačnog Centralnog biračkog spiska Centralna izborna komisija BiH dostavlja nadležnoj izbornoj komisiji u roku od 10 dana, a najkasnije pet dana prije dana održavanja izbora.

(6) Izborna komisija će na osnovu dobijenog izvoda iz konačnog Centralnog biračkog spiska iz stava (5) ovog člana u koloni „potpis“, u Izvodu u kojem je birač upisan za redovno glasanje, pored imena birača unijeti oznaku MOBILNI TIM.

Član 19.

(Izvod iz konačnog Centralnog biračkog spiska za birače koji su zatvorenici ili su vezani za ustanove, a imaju pravo glasati – član 3.14 stav (1) tačka b) Izbornog zakona BiH)

(1) Izvod iz konačnog Centralnog biračkog spiska za lica koja su zatvorenici ili su vezana za ustanove (kazneno-popravni domovi, pritvorske jedinice, gerijatrijske, distrofičarske ili druge zdravstvene ustanove) i imaju pravo glasati sačinjava se na osnovu podataka dobijenih od ustanova u kojima su ova lica smještena.

(2) Izborna komisija će najkasnije u roku od 40 dana prije dana održavanja izbora, za lica iz stava (1) ovog člana, pismenim putem zahtijevati od nadležnog organa podatke o svim licima koja su vezana za ustanove na području njihove općine, odnosno osnovne izborne jedinice.

(3) Organ iz stava (2) ovog člana će najkasnije u roku od 7 dana od dana prijema zahtjeva izbornoj komisiji dostaviti podatke o osobama iz stava (1) ovog člana, koji uključuju: ime, prezime, datum rođenja, JMBG, punu adresu prebivališta, odnosno boravišta za raseljena lica, kao i podatak da li će se ta lica nalaziti u ustanovi na dan održavanja izbora.

(4) Na osnovu podataka iz stava (3) ovog člana, izborna komisija će, putem centra za birački spisak sačiniti plan obilaska ustanova radi upisa birača u izvod iz centralnog biračkog spiska, za glasanje putem mobilnog tima.

(5) Centralna izborna komisija BiH će na osnovu podataka iz stava (3) ovog člana sačiniti izvod iz konačnog Centralnog biračkog spiska za birače iz stava (1) ovog člana, i isti dostaviti nadležnoj izbornoj komisiji u roku od 10 dana, a najkasnije pet dana prije dana održavanja izbora. Nadležna komisija će, u izvodu za redovno glasanje, pored imena birača upisati MOBILNI TIM-USTANOVA.

(6) Za lica koja nemaju prebivalište u osnovnoj izbornoj jedinici u kojoj se nalazi ustanova iz stava (1) ovog člana, a na dan održavanja izbora će se nalaziti u ustanovi, izborna komisija će odmah, a najkasnije u roku od dva dana, po dobijanju izvoda iz konačnog centralnog biračkog spiska iz stava (5) ovog člana, nadležnoj izbornoj komisiji, po mjestu prebivališta lica smještenog u ustanovu dostaviti podatak o tome kako bi ista u rubrici potpis za navedenog birača upisala MOBILNI TIM-USTANOVA.

POGLAVLJE VI. UPIS BIRAČA ZA GLASANJE IZVAN BIH

Član 20.

(Upis i prijava birača za glasanje izvan BiH – član 3.15 Izbornog zakona BiH)

Državljeni BiH iz člana 3.15 stav (1), (2) i (3) Izbornog zakona BiH dužni su da podnesu prijavu na obrascima iz člana 21. i 22. ovog pravilnika.

Član 21.

(Sadržaj obrasca za prijavu PRP-1 i distribucija – član 3.15 stav (8) Izbornog zakona BiH)

(1) PRP-1 obrazac prijave za državljane BiH koji se prvi put prijavljuju za glasanje izvan BiH, koji je sastavni dio ovog pravilnika, sadrži sljedeće podatke:

- a) zaglavlje sa memorandumom Centralne izborne komisije BiH,
- b) izjašnjavanje o statusu birača (privremeni boravak u inozemstvu ili status izbjeglog lica iz BiH),
- c) lične podatke podnosioca prijave: ime i prezime, djevojačko / prethodno prezime, datum rođenja, ime i prezime jednog od roditelja, jedinstveni matični broj, spol lica i mjesto rođenja,
- d) biračku opciju na osnovu dokaza o entitetskom državljanstvu za birače koji glasaju u Brčko distriktu BiH,
- e) izjašnjenje o načinu glasanja, putem pošte ili u DKP BiH i mjestu glasanja,
- f) podatke o prebivalištu u BiH: općina, naseljeno mjesto, ulica i kućni broj,
- g) adresu izvan BiH i kontakt-podaci: ulica i broj, grad, poštanski broj, država, broj telefona i e-mail adresa,
- h) podatke o dokumentaciji koja se prilaže uz prijavu (kopija jednog od ličnih dokumenata iz člana 3.15 stav (4) Izbornog zakona BiH) kojom se dokazuje identitet podnosioca prijave,
- i) potpis podnosioca prijave koji mora biti identičan potpisu sa dokumenta koji se prilaže kao dokaz identiteta podnosioca prijave, i datum podnošenja prijave,
- j) uputstvo za popunjavanje obrasca prijave.

(2) Centralna izborna komisija BiH distribuirat će obrazac prijave iz stava (1) ovog člana putem:

- a) diplomatsko-konzularnih predstavništava BiH za klubove, udruženja građana ili građanima BiH u inozemstvu, u saradnji sa Ministarstvom vanjskih poslova BiH, i
- b) web stranice Centralne izborne komisije BiH i web stranica državnih organa i ureda vladinih i nevladinih organizacija koje se bave izbjeglicama i pitanjima migracije.

Član 22.

(Sadržaj obrasca za prijavu PRP-2 i distribucija - član 3.15 stav (8) Izbornog zakona BiH)

(1) Centralna izborna komisija BiH, nakon raspisivanja izbora, obrazac PRP-2 dostavit će svim biračima koji su se na prethodnim izborima nalazili na izvodu iz Centralnog biračkog spiska za glasanje izvan BiH ili su se do dana objave izbora upisali u Centralni birački spisak za glasanje izvan BiH. Obrazac se dostavlja putem pošte na adresu koju su birači dostavili prilikom posljednje prijave

za glasanje izvan BiH ili na drugu (posljednju ažurnu) adresu o čijoj je izmjeni birač obavijestio Centralnu izbornu komisiju BiH do dana raspisivanja izbora.

(2) Obrazac iz stava (1) ovog člana sastavni je dio ovog pravilnika i sadrži sljedeće podatke:

- a) zaglavlje sa memorandumom Centralne izborne komisije BiH,
- b) podatke o prethodnom upisu birača u Centralni birački spisak za glasanje izvan BiH: ime i prezime, datum rođenja, jedinstveni matični broj, spol lica, adresa izvan BiH i općina / osnovna izborna jedinica za koju lice ima pravo glasa,
- c) izjašnjavanje o promjeni statusa birača (privremeni boravak u inozemstvu ili status izbjeglog lica iz BiH),
- d) izjašnjenje o načinu glasanja, putem pošte ili u DKP BiH i mjestu glasanja,
- e) podatke o promjeni adrese izvan BiH: ulica i broj, grad, poštanski broj, država, broj telefona i e-mail adresa,
- f) podatke o promjeni prebivališta u BiH: općina, naseljeno mjesto, ulica i kućni broj,
- g) biračku opciju na osnovu dokaza o entitetskom državljanstvu za birače koji glasaju u Brčko distriktu BiH,
- i) podatak o dokumentaciji koja se prilaže uz prijavu (kopija jednog od ličnih dokumenata iz člana 3.15 stav (4) Izbornog zakona BiH) kojom se dokazuje identitet podnosioca prijave),
- j) promjene ličnih podataka: ime i prezime, jedinstveni matični broj,
- k) potpis podnosioca prijave koji mora biti identičan potpisu sa dokumenta koji se prilaže kao dokaz identiteta podnosioca prijave, i datum podnošenja prijave,
- l) uputstvo za popunjavanje obrasca prijave.

Član 23. **(Obrada prijave)**

(1) Uz obrasce prijave za izbore, tražena dokumentacija iz člana 21. i člana 22. ovog pravilnika dostavlja se na sljedeći način:

- a) skenira se, odnosno napravi se digitalna kopija dokumenta, u formatu .jpeg ili .pdf, veličina dokumenta, pojedinačno svaki dokument, na način da ne smije biti veća od 1MB i mora biti čitljiva, uz preporuku da se pri skeniranju koriste parametri „Grayscale“ i 300 dpi u omjeru 1:1 (dovoljno je čitljivo i ne kreira previše velike datoteke),
- b) snima se svaki dokument kao posebna datoteka i imenuje se respektabilno po sadržaju,
- c) u nazive datoteka ne stavljaju se slova kao š, đ, ž, č, ć niti specijalni karakteri kao tačka, zarez, navodnik i sl. i
- d) sve datoteke dodaju se u e-mail pod nazivom (Subject) “Prijava PP“ kao prilog (Attachment) i šalju na adresu prijavapp@izbori.ba.

(2) Prijava i prateći dokumenti dostavljaju se putem telefaksa, poštanskog pretinca, lično ili e-mailom za svako lice posebno, bez obzira da li se radi o članovima iste porodice.

(3) Državljeni BiH koji imaju biračko pravo iz člana 20. ovog pravilnika u obrascima prijave za glasanje izvan BiH obavezni su da se izjasne o načinu glasanja, da li će glasati putem pošte ili u DKP BiH, i o mjestu glasanja, a ukoliko se ne izjasne o načinu glasanja, državljani BiH će glasati putem pošte.

(4) Nakon izvršenog uvida Centralna izborna komisija BiH obrađuje prijavu kroz posebnu razvijenu aplikaciju za birače koji glasaju izvan BiH.

(5) U slučaju da prijava ne sadrži sve dokaze utvrđene u članu 3.15 stav (3) i (4) Izbornog zakona BiH ili obrazac prijave nije ispravno popunjen, Centralna izborna komisija BiH će putem službene web stranice, www.izbori.ba, obavijestiti o tome podnosioca da u roku od sedam dana od dana objave otkloni uočene nedostatke.

(6) Podnosilac prijave može provjeriti rezultate obrade prijave u Centralnoj izbornoj komisiji BiH ili na web stranici Centralne izborne komisije BiH.

(7) Centralna izborna komisija BiH će prilikom obrade prijave osigurati poštivanje principa tajnog i ličnog glasanja.

Član 24. (Odbijanje prijave)

Ukoliko podnosilac prijave ne postupi na način propisan u članu 21., 22. i 23. stav (5) ovog pravilnika i ukoliko su narušeni principi iz člana 23. stav (7) ovog pravilnika, prijava lica za glasanje izvan BiH bit će odbijena, a odluka o odbijanju prijave objavit će se na službenoj web stranici Centralne izborne komisije BiH, www.izbori.ba.

POGLAVLJE VII. POSEBNE EVIDENCIJE

Član 25. (Vrste evidencija – član 3.2 stav (3) i član 3.6 stav (2) tačka d) Izbornog zakona BiH)

(1) Centralna izborna komisija BiH vodi posebne evidencije o licima kojima je po osnovu zakona oduzeto pravo da glasaju, kako slijedi:

- a) licu koje je pravosnažnom odlukom nadležnog organa lišeno potpune poslovne sposobnosti i
- b) licu koje ima smetnje prema članovima 1.6, 1.7. i 1.7a Izbornog zakona BiH.

(2) Evidencije iz stava (1) ovog člana sadrže sljedeće podatke:

- a) prezime,
- b) ime,
- c) ime jednog roditelja,
- d) jedinstveni matični broj,
- e) naziv organa koji je donio akt,
- f) broj akta,
- g) datum akta i
- h) rubriku „napomena“.

Član 26. (Način evidentiranja)

(1) O licima iz člana 25. stav (1) ovog pravilnika u rubrici „napomena“ iz člana 3.10 stav (1) tačka i) Izbornog zakona BiH bit će evidentirane činjenice i ona se neće naći na izvodima iz konačnog Centralnog biračkog spiska.

(2) Evidentiranje se vrši na sljedeći način:

- a) za lica iz člana 25. stav (1) tačka a) ovog pravilnika - PS broj i datum rješenja i
- b) za lica iz člana 25. stav (1) tačka b) ovog pravilnika - IZ broj i datum akta.

(3) Ukoliko licu evidentiranom u Centralnom biračkom spisku bude vraćeno biračko pravo u skladu sa zakonom, podaci upisani u napomenu se brišu i licu se vraća biračko pravo.

POGLAVLJE VII. ZAVRŠNE ODREDBE

Član 27. (Prestanak primjene)

Stupanjem na snagu ovog pravilnika prestaje primjena Pravilnika o vođenju Centralnog biračkog spiska („Službeni glasnik BiH“, br. 37/10).

Član 28.
(Sastavni dio pravilnika)

Sastavni dio ovog pravilnika su:

- a) PBO-1 obrazac zahtjeva za eventualnu promjenu biračke opcije raseljenog lica,
- b) PBO-2 obrazac za promjenu biračke opcije,
- c) PRP-1 obrazac prijave za državljane BiH koji se prvi put prijavljuju za glasanje izvan BiH,
- d) PRP-2 obrazac potvrde prijave za državljane BiH koji su ranije bili upisani u izvod iz Centralnog biračkog spiska za glasanje izvan BiH,
- e) obrasci izgleda izvoda iz Centralnog biračkog spiska i
- f) obrasci izgleda konačnog izvoda iz Centralnog biračkog spiska.

Član 29.
(Stupanje na snagu i objavljivanje u službenim glasilima)

Ovaj pravilnik stupa na snagu narednog dana od dana objavljivanja u "Službenom glasniku BiH", a objavit će se u „Službenim novinama FBiH“, „Službenom glasniku RS“, „Službenim novinama Brčko Distrikta BiH“ i web stranici Centralne izborne komisije BiH www.izbori.ba.

Broj: 05-1-02-2-407-1/14
Sarajevo, 24.04.2014. godine

